

PAPIAMENTO NA SKOL SI of NO ?

* ORTOGRAFIA NO TA IDIOMA

* ORTOGRAFIA TA UN KONBENIO

Problemanan ta bin ora tin diferensia di opinion. Un di e diferensianan ku ta reina enkanto Papiamento ta, si Papiamento tin palabranan adekwá pa duna les na MAVO i HAVO. Es desir, si tin palabranan sufisiente pa splika problemanan sientífiko.

Departamento di Kultura i Edukashon a studia e problema aki i e resultado ta ku sigur tin e palabranan aki na Papiamento.

Tur hende ku a studia e problema aki si ta di akwerdo ku Papiamento mester drenta ensenjanza. Nan ta sali for di punto di bista ku un mucha mester siña su mes lenga promé ku e siña otro. Hopi di nos lo bisa ku esaki no ta berdát, pasobra Papiamento e muchanan ta siña na kas mes. Pero ta kwa major tin tempo pa sinta ku su yunan pa laga nan lesa korant i korigi nan foutnan?

Ademas, si majornan hasi esaki, nan mes lo ripará ku nos dushi Papiamento tin hopi difikultat ku ningun hende a jega di splika nan mes. Ta kon nan, e majornan por siña e muchanan asina?

Un problema grandi pakiko Papiamento no a drenta ensenjanza ainda, ta e problema di ORTOGRAFIA.

Ortografia kier men e manera pa skirbi un palabra. Riba e tereno aki tabata i te ainda tin hopi diskushon.

Tokante ortografia tin dos grupo. Un grupo ta bisa ku mester skirbi e palabranan asina, ku bo por mira di unda e palabra aki ta bini. Por ehempel nos lo skirbi "kas" ku "c", pasobra kas ta bini for di e palabra Spanjò "casa".

E manera di skirbi aki nan ta jama ORTOGRAFIA ETIMOLOGICO of TRADICIONAL.

Un otro grupo ta bisa ku bo mester skirbi e palabranan segun nan zonido. Si bo tende un "k" bo ta skirbi un "k" tambe. E grupo aki anto lo skirbi "kas" ku un "k".

Nan ta e grupo cu ta favoresé e ortografia ku nos ta jama ORTOGRAFIA FONOLOGIKO.

Kier men anto:

ETIMOLOGICO nos lo skirbi cos cu un "c", pasobra e ta bini di e palabra Spanjò "cosa".

FONOLOGIKO nos lo skirbi kos ku "k", pasobra ora bo bisa kos bo ta tende un "k".

Awor nos ta puntra nos mes ta kwa di e gruponan aki tin rason? Segun mi, ningun di dos. Pasobra ortografia ta un konbenio.

Manera nos sa na Aruba Gobierno Insular a bini na un konbenio ku Aruba lo usa e Ortografia Etimológico, o manera nan ta jamé, Tradicional.

Algun hende, en partikular maestronan di skol, no ta di akwerdo

ku e Ortografia Etimológico. Segun nan, e ortografia aki ta bira hopi difisil, pasobra ora di skirbi un palabra, e muchanan mester buska promé ta di kwa lenga e palabra ta bin. Fwera di esaki, e ortografia Tradicional tin hopi reglanan, i riba e reglanan tin hopi eksepsion.

Segun e maestronan si bo skirbi loke bo tende, Ortografia Fonológico ta hopi mas fasil pa siña e muchanan.

Un otro problema ta skirbimento di buki. Suponé ku tin hende pa skirbi buki na Papiamento pa nos muchanan di skol, ainda nos ta keda ku un otro problema. Esaki ta e gasto enorme ku Aruba mester hasi pa publiká buki pa un poblashon di..... aproksimadamente 63.000 hende. Esaki ta nifiká ku e benta di buki lo no por kubri e gastonan. I unabes ku Korsow ta pensa na introdusí e Ortografia Fonológico, ta difisil pa bende buki ku nan.

Lo tabata mas fasil si nos por a pone KABESURA i POLITIKA un banda i pensa solamente riba nos yunan. Pasobra ku kabesura i zundramento te ku nos ta ofendé otro, nunca nos lo jega na un KONBENIO.

